

ASTEJORRAN

Zenbat bizitza ditu Felipe Gonzalezek

Turroia Moncloan janaz bat ekin zion Felipe Gonzalezek Erregeei karta idazteari. Ez du inoiz sentitu gutun dontsu hori idazteko horrelako premiarik. Eskuan eman omen zion bizar zuriri. Mesedez ez beste guztiekin nahasteko eta berak ere eskuz-esku emateko Meltxor, Gaspar eta Baltasarri.

Geroztik Felipe Gonzalez ez dago. Antza denez, «ni se le espera». Bere onenak emanak omen ditu dagoeneko. Ez du barne indarrak orain bapatean hamabi urtetako trapu zaharren kolada jendaurrean egun gutxi batzutan egiteko. «El patio de mi casa es particular» sokasaltoan kantari eman du hamarkada osoan zehar eta, orain, tupustean, autista bilakatu zai-gu. Bere barkadadearekin bakarrik, isolatuta. Etxean, inguruan, politikan, gizartean... Estatuan gertatzen ari denari jaramonik egin gabe.

Irteera guztietan pareta galanta eraikitzen aritu denak zultoxoa behar du orain ezinbestean. PSOEren barruan ez du ondorengorik. Izan zitezkeenak denak kiskali ditu. Erabili eta bota, moztu belarra hankapean arraioa. Pilotaleku-ko txapara ere iristen ez ziren gobernu lagunak aukeratu izan ditu askotan inork itzalik egin ez ziezaion. Gobernuburuaren gaitzak omen dira. Gaitz endemikoak. Bunker atomikoak txikikeria izan, bunker sikologikoaren ondoan. Aduladoreak, gorteak, jauregiaren inguruko eratzun hertsia. Defendatzaileak bai baina azkenean itotzailak.

Gazteluaren kanpokaldetik konfesio nagusia egiten jarri dute epaileak, kazetariak, sindikatuak, oposizioako politikoa... Aitor ditzala alegia hamarkada osoan egindako gaitz guztiak joan ala bota aurretik. Felipe Gonzalezek ez die ikusten, antza denez, aitorle laiko

hauei absoluziorik emateko gogo haundirik eta hortxe dirau Moncloako kaperan bakardadean, isiltasunean ahots ozenik entzungo duelakoan.

Ondorioz meditazio sakonean dihardu argitasun bila. Ez du ispilurik behar X horren sudur luzexka ikusteko. Ez du froga kaligrafikorik behar sinadura beti hizki nagusiz egiten duela jakiteko. Ez du audio zintarik behar bere ahotsaren sibilanteen berezitasuna eza-gutzeko. Alferrik dentistarena joatea, ondo baitaki izkutuan 'Cohibas' ugari erretzeagatik hortzak beltz-beltz eginda dituela. Zertan lagunduko lioke pelukeroak, nahiko lan baitu azkenaldian arraia erdi-erdian egin eta ezker zein eskuineko sarrerak estaltzeko.

Estali, estali... Hortxe baitago gakoa. Azak eman dizkio Garzonek odolki eta guzti. Ahoa bete haginekin utzi du, noiz eta bareak jota dagoenean. Flakeziak jota, indarrak eta irtenbiderik gabe. Zer egin orain?

Nahiz eta aste osoan Pepe Barrionuevoren ahots trumoisua besterik entzun ez duen, ezin gainetik kendu Barne ministrari ohiaren jarduna. Txaplata galanta! Hori trebezia diputatuarena: dena kontra jarri eta, gainera, bere karta guztiak erakutsi alajainkoa. Eskerrak oraindik Garzonen Xak bere horretan izkutuan darraien. Lastima ekuazioak inkognita bakarria izatea. Garzon zientzietakoa balitz gutxienez hiru inkognitako ekuazioa emango zukeen eta, dagoeneko, izango luke argibiderik. Zein balio izango luke X horrek, baldin eta Y Barrio-

JOXE JOAN
TXABARRI

Geroztik Felipe Gonzalez ez dago. Antza denez, «ni se le espera». Bere onenak emanak omen ditu dagoeneko. Ez du barne indarrak orain bapatean hamabi urtetako trapu zaharren kolada jendaurrean egun gutxi batzutan egiteko.

nuevo balitz eta Z Sancristo-bal?

Bellochek, intxixua bailitzan, hitz-estalika esan dio lasai egoteko. Berak dakienez, eta asko dakiela, ez duela arazo horietan itzalik utzi. Baina Gonzalez ez da fidô. Belloch zauriaren gainean pikoka ari zaiola uste du. Txapel batez bi buru estali nahian alegia. Errazegi irensten ditu Gonzalezek ustez gezak eta gaziak. Epaile hauek! A zer hirukotea: Belloch, Garzon eta Perez Mariño. 'Putrearen kinta' deitu izan diete hiltzorian dagoenaren jirabiran kupidarik gabe dabilzalako. Epaileok diputatu egin zituen Felipe Gonzalezek bizitza publikoa garbitzen laguntzeko. Garbiketa lanei ekin dietenean 'auzo berritik' hasteari ez dio zuzen eritzi presidenteari. Akuiuluaren kontra egin dute ostiko. Ba ote da demokrazia baterako auzo nazkagariagorik?

Erregeei idatzi gutunetik jakin ahal izan denez, duintasunez bukatu nahi omen du Gonzalezek. Santu hostean hil. Hori omen du balintza bakarra. Maiatzaren 28an PSOEek estatua osoan izango duen ekaitzaren zenbatekoa eta nolakoa urruneko meteorologoen ere iragarten omen dute Ekialdeko Erregeek aditzera eman diotenez. 1995.eko bigarren sei hilabetekoan Europako buru izateak eskeiniko omen dio arnasbiderik. Baina iritsi egin behar. Zein urrun dagoen... ekaina! Buztana hankapean eta herio suharrean izanik, oraingoan hauteskunde-tara berehala deitzeke irauten badu, izango da mirakuluetan sinisten hasiko denik.

PERIODIKOA LEITUZ
ILUSTRATZEN GARA

Martxelo Otamendi

Periferikoak

Hego Euskal Herriko lurralde ez nafarrean bizi garen euskaldun askorentzat harrigarri —haserrebeide ere bai, daukagun egunaren arabera— izaten da nafar euskaltzale —koalifikatu eransteko tentaldian erortzeaz egon naiz— talde batek bere buruari periferiko deitzen diola jakitea. Informatiboki Nafarroa baztertzea leporatzen digute EAEko ikuspegitik egindako komunikabideoi.

Albistegai diren beste bi kontu txiki jakin ditugu aste honetan, biak 'Diario de Noticias-en' eskutik. Lehena Burlatako PSOEek hautsi egin duela bertako udaletxean HBrekin zuen gobernu-paktua —ez dira asko izango Hegoalde osoan horrelakoak— eta bigarrena Nafarroako EA, EAJ, EUE eta independenteak Foru Parlamentuko hauteskundeetara batera joateko bilerak egiten ari direla EA eta EAJko batzorde eragileak.

Baina asteako benetako izarra, 'Euskadi Irratia-n' Leitzako UPNko zinegotzi batek bataiatu zuen bezala, «bi buru estali nahi dituen txapela» izan da: Juan Cruz Alli. Duela astebate jakin genuen Aizpunek 'Telenavarra-n' esandakoa: «Ez dakit zer pentsatzen duen alderdiak baina nire ustez bukatu da Jaimeren alkate garaia». Hori baino adierazgarriago izan zen handik gutxira esan zuena: «Behar dena da postuak hartu nahi dituen benetan trebatua egotea». Duda-ekin geratu ginen Jaimeren gaitasuna zalantzen jartzen ari ote zen. Allik alderdi berria egiteko moduan zegoela adierazi bezain fite eskaini zizkion ia bi orri, Fernando Mugika zuzendariaren lumaz, 'Diario de Noticias-ek' alderdi berriaren lehen agerpen programatiko-estrategikoa zirudien artikuluan: «Izan ote liteke epe laburrean errealtate bat? Erantzuna ezin liteke errazago izan. Nire ikuspegitik objetiboki beharrezko da, hala maila lokalean nola nazional-lean, belaunaldi aldaketa. Egiteke dagoen aldaketa. Ez dira liderrak falta, ezta konprometitu nahiko duten pertsonak ere». Idatzi al liteke garbiago?

UPNko gazteria Alliren aldekoa izango zela espekulatu genuen astean zehar, baina erantzuna, behartua ala ez beste kontu bat da, Sanchez de Muniain UPNko gazteen presidentek eman zuen osteguneko 'Diario de Navarra-n': «Guk ezer esan aurretik jo gaitu Allik aldekotzat».

Editorializatu duten egunerokoen artean denetarik izan da. 'Egin-ek' ez du oso garbi ikusten alderdi berriaren osaketa: «Baina Nafarroako errealtatea hobeto eza-gutzeko eta bere benetako arazoez jabetzeko, seguraski hobe da sektore nafar horrek —UPN— alderdi bakar batean segitzea, errealtate eta gaurkotasan handiagorantz eboluzionatuz». 'El Mundo-k', UPNn gertatzen ari dena lehendik beste alderdi batzuetan ere gertatu dela azpimarratu nahi izan zuen editorial berean, garbi ikusi zuen alderdi berriaren kontua bertan behera uztea Alliren maniobra izan litekeela, «aukera emango diona erreserba aktiboan egoteko, Nafarroako gizartearen ukaezinezko bilakaerak alarma argiak piztu zain». «Aterki estrategikoa» deitu zion horri Jose Felix Azurmendik asteazkeneko 'Deia-n'.

HARA!

Mattin

